

四庫全書

集部

欽定四庫全書

御定佩文齋詠物詩選卷二百三十九

道士類

五言古

貽韋鍊師

唐 儲光羲

精思莫知日意靜如空虛三鳥自來去九光遙卷舒新
池近天井玉宇停雲車余亦苦山路洗心祈道書

越中逢天台太乙子

唐 孟浩然

仙穴逢羽人停艤向前拜問余涉風水何處遠行邁登
陸尋天台順流下吳會茲山夙所尚安得聞靈怪上逼
青天高俯臨滄海大雞鳴見日出常覲仙人旆往來赤
城中逍遙白雲外莓苔異人間瀑布當空界福庭長自
然華頂舊稱竄永此從之遊何當濟所屆

與王昌齡宴黃道士房

孟浩然

歸來卧青山常夢遊清都漆園有傲吏惠好在招呼書
幌神仙錄畫屏山海圖酌霞復對此宛如入蓬壺

題盧道士房

唐 李頌

秋砧響落木共坐茅君家惟見兩童子林前汲井華空壇
靜白日神鼎飛丹砂塵尾拂霜草金鈴搖霧霞上章人世隔
看奕桐陰斜稽首開仙要黃精堪餌花

寄全椒山中道士

唐 章應物

今朝郡齋冷忽念山中客澗底束荆薪歸來煮白石欲持一樽酒遠慰風雨夕落葉滿空山何處尋行跡

尋華山雲臺觀道士

唐 錢起

秋日西山明勝趣引孤策桃源數曲盡洞口兩岸坼還
從罔象來忽得仙靈宅霓裳誰之子霞酌能止客殘陽
在翠微攜手更登歷林行拂煙雨谿望亂金碧飛鳥下
天窗裏松際雲壁少尋元蹤遠宛入寥天寂願言葛仙
翁終年煉玉液

山中訪道者

唐于鵠

觸煙入谿口岸岸惟檉櫟其中盡碧流十里不通屐出
林山始轉絕徑緣峭壁把藤借行勢側足憑石脈歛牙

斷行處光滑猿猱跡忽然風景異乃到神仙宅天晴茅屋頭殘雲蒸氣白隔窗梳髮聲久立聞吹笛抱琴出門來不顧人間客山院不灑掃四時自虛寂落葉埋長松出地纔數尺曾讀上清經知注長生籍願示不老方向山有瓊液

送蕭鍊師入四明山

唐孟郊

閒於獨鶴心大於高松年迥出萬物表高棲四明巔千尋直裂峯百尺倒瀉泉絳雪為我飯白雲為我田靜言

不語俗靈蹤時步天

送李尊師元

孟郊

口誦碧簡文身是青霞君頭冠兩片月肩披一條雲
松骨輕自飛鶴心高不羣

送道士

孟郊

千年山上行山上無遺蹤一日人間遊六合人皆逢自
有意中侶白雲徒相從

別尹鍊師

唐李羣玉

吾家五千言至道懸日月若非函闢令誰註流沙說多
君飛昇志機悟獨超拔學道玉笥山燒丹白雲穴南窮
衡疑秀採藥歷幽絕夜卧瀑布風朝行碧巖雪洞宮四
百日玉籍恣探閱徒以菌蟪姿緬攀修真訣塵籠罩浮
世遐志空飛越一罷棊酒歡離情滿寥泬願騎紫蓋鶴
早向黃金闕城市不可留塵埃穢仙骨

山中道者

唐蘇拯

筇杖六尺許坐石流泉所舉頭看古松似對仙鶴語是

時天氣清四迴無塵侶顧我笑相迎知有丹砂異

寄鄧道士

宋蘇軾

一杯羅浮春遠餉採薇客遙知獨酌罷醉卧松下石幽
人不可見清嘯聞月夕聊戲庵中人空飛本無迹

送許尊師還大滌洞

明張羽

青山九鎖處白髮一龕居清齋誦黃老不閱世間書餐
霞食真氣對月禮空虛暫來流水地應與孤雲疎遙知

還山日仙壇春草餘

寄琪林黃道士

明孫蕡

雨絕天景佳前榮樹光綠遙憐采芝侶遠在春山曲琴歌久已斷酒賦何由續有約今夕同開樽掃茅屋

七言古

附長短句

望龍山懷道士許法稜

唐劉長卿

心惆悵望龍山雲之際鳥獨還懸崖絕壁幾千丈綠蘿
嫋嫋不可攀龍山高誰能踐靈原中蒼翠晚嵐煙瀑水
如向人終日迢迢空在眼中有一人披霓裳誦經山頂

餐瓊漿空林間坐獨焚香真官列侍儼成行朝入青霄
禮玉堂夜掃白雲眠石牀桃花洞裏居人滿桂樹山中
住日長龍山高遙相望

贈別華陰道士

唐韓翃

紫府先生舊同學腰垂形管貯靈藥恥論方士小還丹
好飲仙人太元酪芙蓉山頂玉池西一室平臨萬仞溪
畫灑瑤臺五雲濕夜行金燭七星齊回身暫下青冥裏
方外相尋有知已賣鮓市中何許人釣魚坐上誰家子

青青百草雲臺春煙駕霓裳白角巾露葉獨歸仙掌去

迴風片雨謝時人

送戴真人歸越

元虞集

戴先生日飲五斗醉不得再飲一石不肯眠昨從桃源來兩袖攜風煙長安道上小兒女拍手攔道呼神仙馬如遊龍花如雨蹴踘春秋作朝暮東方不作窗間戲上帝還令海邊去海邊玉虹夜不收貝宮珠闕皆蛟蚪芝田玉樹久相待天上老仙那肯留戴先生鑑湖之水三

千丈不可以鑑可以釀明朝亦脫錦袍去與汝酣歌釣
船上

和韻三茆山呈張伯雨外史

元薩都拉

碧桃花落蓬萊宮銀屏甲帳圍春風冰簾卷水玉堂靜
白露滴月銀牀空仙人夜酌九霞酒手握北斗傾尊中
梧枝落影鳳凰語幽韻彷彿臨蒼穹伐毛洗髓天地老
火鼎夜出芙蓉紅呼龍洞口種瑤草採藥忽遇松間童
茆君自騎一虎去猶聞珂珮聲丁東武華山人三載別

綠袍赤杖蒼髯翁淮南江上復相見落日澹澹天無窮
明朝稽首渡江去楚水清淺銀河通

御製山水圖歌賜長春真人劉淵然歸南京

明宣宗

東華之東湛明景彩霞環繞蓬萊境瓊枝瑤草春不窮
丹光夜動黃金鼎淵然老仙崆峒客萬里歸來此棲息
手持如意青芙蓉兩臉潮紅頭雪白頭上玉琢冠身中
雲繡衣朝朝飛神馭然超汗漫直上太清朝紫微腰間

騰龍雙寶劒秋水光晶寒激灑嘯風呼霆作霖雨屢注
仙瓢蘇下土功成效用歸希夷元天至道本無為眼看
民患忍坐視恤人亦體天之慈旦來謝別何怱怱騎鶴
徑度江之東江東龍盤虎踞五雲表鍾山翠接三茅峯
茅家兄弟青冥上白日驂鸞定相訪還來赤松子亦有
安期生上朝南極壽昌星好山好水清且明西方出金
桃南斗斟雲液長生有歌舞且歌年過廣成千二百

贈丘老師

明高啓

長春之孫自仙骨袖有蟠桃食遺核平生不學燒汞方
唾視黃金等何物滿城誰識舊庚桑白髮人中似鶴長
時上高樓惟獨醉榴皮書破壁塵香

洞虛道院訪鶴山道士

明 王 問

洞虛清寒十二時絳樓簾幕鎮長垂庭中槭槭卷風葉
玉露凋落青梧枝身騎飛龍逐流電聞君受法通明殿
萬里雲霄鶴一聲夜靜歸來月如練

五言律

寄天台司馬道士

唐崔湜

聞有三元客，祈仙九轉成。
人間白雲返，天上赤龍迎。
尚惜金芝晚，仍攀琪樹榮。
何年缑嶺上，一謝洛陽城。

寄天台司馬道士

唐張說

世上求真客，天台去不還。
傳聞有仙要，夢寐在茲山。
朱闕青霞斷，瑤堂紫月閒。
何時枉飛鶴，笙吹接人間。

奉餞高尊師如貴道士傳道錄畢歸北海

唐李白

道隱不可見靈書藏洞天吾師四萬劫歷世遞相傳別
杖留青竹行歌躡紫煙離心無遠近長在玉京懸

尋洪尊師不遇

唐 劉長卿

古木無人地來尋羽客家道書堆玉案仙坡疊青霞鶴
老難知歲梅寒未作花山中不相見何處化丹砂

尋南谿常道士

劉長卿

一路經行處莓苔見屐痕白雲依靜渚青草閉閒門過
雨看松色隨山到水源谿花與禪意相對亦忘言

尋賈尊師

唐盧綸

玉洞秦時客
焚香映綠蘿
新傳左慈訣
曾與右軍鵞井
臼陰苔遍方
書古字多成都
今日雨曾與酒相和

贈月谿羽士

唐戴叔倫

月明谿水上
誰識步虛聲
夜靜金波冷
風微玉練平
自知塵夢遠
一洗道心清
更弄瑤笙罷
秋空鶴又鳴

贈道者

唐朱慶餘

獨住神仙境
門當瀑布開
地多臨水石
行不惹塵埃
風

起松花落琴鳴鶴翅廻還歸九霄上時有故人來

山中道士

唐賈島

頭髮梳千下休糧帶瘦容養雛成大鶴種子作高松白
石通宵煮寒泉盡日春不曾離隱處那得世人逢

靈都觀李道士

唐張籍

山觀雨來靜遙房瓊草春素書天上字花洞古時人泥
竈煮靈液掃壇朝玉真幾廻遊閭苑青節自隨身

贈王道士

唐于鵠

去尋常不出門似絕人行牀下石苔滿屋頭秋草生學
琴寒月短寫易晚窗明惟到黃昏後谿中聞磬聲

送秦鍊師

唐李羣玉

紫府靜沈沈松軒思別吟水流寧有意雲汎本無心錦
洞桃花遠青山竹葉深不因時賣藥何路更相尋

送王道士

唐馬戴

真人俄整舄雙鶴屢飛翔恐入壺中住須傳肘後方霓
裳雲氣潤石徑木苗香一去何時見仙家日月長

送道友入天台山作

馬戴

却憶天台去移居海島空觀寒琪樹碧雪淺石橋通漱
齒飛泉外餐霞早境中終期赤城裏披氅與君同

贈王尊師

唐劉得仁

為道常日損尊師修此心挂肩黃布被穿髮白蒿簪符
札靈砂字絃彈古素琴囊中常有藥點土亦成金

贈道者

唐唐球

披霞帶鹿胎歲月不能催飯把琪花煮衣將鶴葉裁鶴

從歸日養松是小時裁往往樵人見谿邊洗藥來

逢道者神和子

唐王 軶

珍重神和子聞名五十年童顏終不改綠髮尚依然酒
裏消閒日人間作散仙長生如可慕相逐隱林泉

贈聾尊師

唐杜荀鶴

詩道皆仙分求之不可求非關從小學應是數生修蟾
桂雲梯折鼇山鶴駕遊他年兩成事堪喜是鄰州

送喻鍊師歸茅山

唐李建勲

休糧知幾載臉色似桃紅半醉離塵去單衣行雪中水聲茅洞曉雲影石房空莫學秦時客音書便不通

遇道者

唐張賓

數里白雲峯身輕無履蹤故尋多不見偶到即相逢古井生靈水高壇出異松聊看杏花酌便似換顏容

山寺喜道者至

唐僧貫休

閏年春過後山寺始花開還有無心者閒尋此境來鳥幽聲忽斷茶好味重回知住南巖久冥心坐綠苔

宿休庵用德功壁間韻贈陳道人

宋朱子

暮入千峯裏寒棲一草庵室連丹竈
煖厨引石泉甘塵慮紛難到神光曖
內含非君有道氣孤絕詎能堪

送倪道士之廬山

宋趙師秀

近方辭地肺本自住天台有鶴相同出無雲作伴回道房隨處借詩板逐時開又說廬山去閒看瀑布來

贈熊鍊師

宋翁卷

松邊自掩扉賣藥罷方歸教客認仙草笑人求紫衣惜
琴眠處放翫易語時稀見說沅砂賤閒身去欲飛

修真院訪崔道士

宋真山民

竹扉蒼蘚牆林下小丹房風定香煙直月斜簾影長淪
茶泉味別點易露痕杳安得棲塵外求師却老方

初夏訪劉道士

真山民

白雲隨杖履伴我到山房暑薄疑天別林深見路長木
芝皆道味花竹亦詩香更待荷花後來分半榻涼

贈楊洞天道人

元 馬祖常

我自不入俗君今又欲仙鳥啼百花裏屋住萬山邊密
樹雲難過空潭月易圓題詩秋卷了為說小行年

寄題汪道士草亭

元 虞 集

飛白妙娉婷新題照草亭仙遺相鶴法客借換鶩經霧
雨歸懸忝風雲護茯苓遙知春晝永深坐養黃庭

寄王道士宗晉

元 倪 瓊

王君舊隱地聞更結茅茨鶴氅春裁苧鶯羣雪汎池時

歌綠水曲不負碧山期夜雨生芳草令人起夢思

懷王道士

明袁凱

宣城王道士愛著芰荷衣一自清江別三年白雁飛酒徒隨處有沽客向來稀竇憶青城夜狂歌不肯歸

送呂道士

明張羽

石室無人住歸心似鶴輕山君驅虎去童子報丹成玉竇憑龍守芝田借雨耕懷君明月夜遙聽步虛聲

寄方壺道人

明詹同

海上神仙館天邊處士星卧雲歌酒德對雨著茶經石
洞龍噓氣松巢鶴墜翎都將金玉句一一寫空青

五言排律

贈焦道士

唐王維

海上遊三島淮南預八公坐知千里外跳向一壺中縮
地朝珠闕行天使玉童飲人聊割酒送客乍分風天老
能行氣吾師不養空謝君徒雀躍無可問鴻濛

贈東嶽焦鍊師

王維

先生千歲餘五嶽遍曾居遙識齊侯鼎新過王母廬不能師孔墨何事問長沮玉管時來鳳銅盤即釣魚聳身空裏語明日夜中書自有還丹術時論太素初頻蒙露版詔時降軟輪車山靜泉逾響松高枝轉疎拂頤問樵客世上復何如

逢牛尊師

明林鴻

道逢牛道士把酒醉雲房龍問壺中訣人傳肘後方久知鳧是鳥更指石為羊遣興聊題翰無言但括囊秋星

明効氣夜月讓丹光酣飲從傾倒神遊極混茫別情波
渺渺歸路樹蒼蒼又櫂扁舟去尋雲到草堂

七言律

送方尊師歸嵩山

唐王維

仙官欲住九龍潭旄節朱轎倚石龕山壓天中半天上
洞穿江底出江南瀑布松杉常帶雨夕陽彩翠忽成嵐
借問迎來雙白鶴已曾衡嶽送蘇耽

送張道士歸茅山謁李尊師

唐皇甫冉

向山獨有一人行近洞應逢雙鶴迎常以素書傳弟子
還因白石號先生無窮杏樹何年種幾許芝田帶月耕
師事少君年歲久欲隨旄節徃層城

題嵩陽焦道士石壁

唐錢起

三峯花畔碧堂懸錦里真人此得仙玉體纔飛西蜀雨
霓裳欲向大羅仙綵雲不散燒丹竈白鹿時藏種玉田
幸入桃源因出世方期丹訣一延年

贈韓道士

唐戴叔倫

日暮秋風吹野花上清歸客意無涯桃源寂寂煙霞閉
天路悠悠星漢斜還似世人生白髮定知僊骨變黃芽
東城南陌頻相見應是壺中別有家

贈道士

唐李端

姓氏不書高士傳形神自得逸人風已傳花洞將秦接
更指茅山與蜀通嬾說歲年齊絳老甘為鄉曲號涪翁
終朝賣藥無人識敝服徒行入市中

贈東嶽張鍊師

唐劉禹錫

東嶽真人張鍊師高情雅淡世間稀堪為列女書青簡
久事元君住翠微金縷機中拋錦字玉清潭上著霓衣
雲衢不要吹簫伴只擬乘鸞獨自飛

送胡鍊師歸王屋

唐 張籍

王陽峯下學長生洞府仙鄉已有名獨戴熊鬚冠暫出
惟將鶴尾扇同行煉成雲母休炊爨召得雷公當吏兵
却到瑤壇上頭宿應聞空裏步虛聲

尋郭道士不遇

唐 白居易

郡中乞假來相訪洞裏朝元去不逢看院祇留雙白鶴
入門惟見一青松藥爐有火丹應伏雲碓無人水自春
欲問參同契中事更期何日得相從

尋趙尊師不遇

唐姚鵠

羽客朝元晝掩扉林中一徑雪中微
松陰遶院鶴相對
山色滿樓人未歸
盡日獨思風馭返寥天
幾望野雲飛
憑高目斷無消息
自醉自吟愁落暉

贈道者

唐劉威

五雲深處有真仙
歲月催多却少年
入郭不知今世事
賣丹猶覓古時錢
閒尋白鹿眠瑤草
暗摘紅桃去洞天
時向人間深夜坐
鬼神長在藥囊邊

贈道者

唐劉滄

真趣淡然居物外
忘機多是隱天台
停燈深夜看仙錄
拂石高秋坐釣臺
賣藥故人湘水別
入簷棲鳥舊山來
無因朝市知名姓
地僻衡門對嶽開

贈道士

唐褚載

簪星曳月下蓬壺曾見東臯種白榆六甲威靈藏瑞檢
五龍雷電遶霜都惟教鶴探丹丘信不使人窺太乙爐
聞說葛陂風浪惡許騎青鹿從行無

華山李鍊師所居

唐皮日休

麻姑古貌上仙才謫向蓮峯管玉臺瑞氣染衣金液啟
香煙暝面紫文開孤雲盡日方離洞雙鶴移時只有苔
深夜寂寥存想歇月天時下草堂來

送羽人王錫歸羅浮

唐曹唐

風前整頓紫荷巾常向羅浮保養神石磴倚天行帶月
鐵橋通海入無塵龍蛇出洞閒邀雨犀象眠花不避人
竇愛葛洪尋藥處露苗煙藥滿山春

贈道人

唐曹松

住山因以福為庭便向山中隱姓名閭苑駕將雕羽去
洞天贏得綠毛生日邊腸胃餐霞火月裏肌膚飲露英
顧我從來斷浮濁擬驅雞犬上三清

龍潭張道者

唐伍喬

碧洞幽巖獨息心時人何路得相尋養生不說憑諸藥
適意惟聞在一琴石徑掃稀山蘚合竹軒開晚野雲深
他年功就期飛去應笑吾徒多苦吟

貽廬山清谿觀王尊師

唐李中

霞帔星冠復杖藜積年修鍊住靈溪松軒睡覺冷雲起
石磴坐來春日西採藥每尋巖徑遠彈琴常到月輪低
鼎中龍虎功成後海上三山去不迷

贈王道者

李中

混俗從教鬢似銀世人無分得相親槎流海上波濤閣
酒滿壺中天地春功就不看丹竈火性閒時拂玉琴塵
仙家變化誰能測只恐洪崖是此身

贈鍾尊師遊茅山

李中

筇杖擔琴背俗塵路尋茅嶺有誰羣仙翁物外應相遇
靈藥壺中必許分香入肌膚花洞酒冷侵魂夢石牀雲
伊余亦有朝修志異日遨遊願見君

寄西華黃鍊師

唐羅隱

西華有路入中華依約山川認永嘉羽客昔時留篠簜
故人今又種煙霞壇高已降三清鶴海近因通八月槎
盛事兩般君總得老萊衣服戴顚家

贈奚道士

宋徐鉉

奚生曾有洞天期猶傍天壇摘紫芝處世自能心混沌
全真誰見德支離玉霄壁閉人長在金鼎功成俗未知
他日飈輪謁茅許願同雞犬去相隨

寄茅山溫尊師

宋趙師秀

幾度題詩寄入山 不知何處得書看
莓苔石上秋吟苦 星斗壇中夜拜寒鶴
改新名呼未至碑 逢斷刻打應難
憶師每欲尋師去 芝术裁成自可餐

贈玉隆劉道士

宋劉克莊

觀中曾訪老黃冠 爾尚為童立醮壇
新染氅衣披得稱 舊泥丹竈出來寒
詩非易作須勤讀 琴亦難精莫廢彈
憶上洪崖題瀑布 因遊試為拂塵看

送戴道士住天台

元程鉅夫

君承恩命住天台萬壑千峯繞絳臺門外霞川浮溟滓
杯中雲海接蓬萊時同野鶴看桃去或領山猿採藥廻
三十年前吾亦到舊題應入白雲堆

訪李真人不遇

元虞集

退朝花底珮珊珊去訪真人曉出闢芳草欲迷行徑古
長松深護步廊間蒼龍挾雨探瑤簡白鹿穿雲致玉環
如到天壇看月影定知清露滿人間

送薛元卿歸龍虎山

元楊載

金門詔下羽人歸欲向山中採蕨薇琥珀懸崖松樹老
琅玕倚澗竹根稀高巖蓄雨星辰濕古石懸雲徑路微
養性可無軒冕累遊塵元不涴仙衣

送王真人北上代劉宗師

元薩都拉

玉佩丁東下界聞天風吹動碧霞裙劉郎跨鶴遊三島
王子吹笙到五雲洞府夜光傳玉印石壇月黑禮茅君
若逢天上吳夫子應問丹砂煉幾分

送上清道士李士賓歸山

元張翥

歸去青谿點易窗仙林如子世難雙丹藏虎豹千山雪
劍度魚龍萬里江別洞苔花分石路古壇松子落巖淙
道人不用尋煙火木煎經冬正滿缸

贈天台李鍊師

元貢師泰

翠蛟青鳳下晴空家住天台第幾重歲久松肪成琥珀
夜深丹氣出芙蓉仙童奏簡騎文虎太乙懸旗起絳龍
昨夜從師到天上故山還著白雲封

贈仙居散人

貢師泰

青山四面玉差峩中有山人隱薜蘿細雨閒門芳草滿
微風深澗落花多童窺丹竈時驚鶴客寫黃庭欲換鶩
我亦平生愛疎散春來應許謝朝珂

送袁道士

元王士熙

軒轅雲裔越公家學道青山幾歲華仙覓安期曾授棗
詩成湘子解開花金砂擬煉長生藥銀海初回遠使槎
二十四巖明月夜簫聲何處落煙霞

送趙虛一降香至南海廬山會稽

元

薛漢

天香分下殿西頭處士今乘使者騎曾是騎麟參北斗
真成跨鶴過揚州山中五老應相識海上三神亦易求
勾越東南仙柱觀神光依舊貫林丘

贈松崖道士

元周權

名山歷遍氣飄浮面帶風霜雪滿頭碧澗寒通丹井曙
青松影落石潭秋布袍洗藥香猶濕砂釜藏茶火自留
笑問閭風何處是追遊還許借青牛

別章鍊師

元 倪 瓚

方舟共濟春江闊訪我寒煙菰葦中鼓棹斜衝瀆葉雨
鈎簾半怯杏花風仙人壇上芝應碧玉女窗中桃未紅
擬趁輕帆數來往縹壺不惜酒如空

寄贈皇厓壇劉鍊師

元 郭 鈺

神仙宮館近青冥紫翠峯巒開畫屏日射水晶江石白
雲封琥珀嶺松青虎司丹鼎知留訣鶴立瑤壇聽說經
相約安期今夕至靈風遙想滿虛櫨

送秦東海法師遊上清

明 王 睇

為愛仙山絕世氣蒼苔寂寞路難分白羊歲久渾疑石
瓊樹春深半是雲洗藥泉香龍蛻骨吹簫臺迴鶴成羣
隱文秘訣無人識我欲相從一問君

送趙一陽真士歸雪上

明 周 砥

渺渺晴湖白鷺飛青山迢遞夕嵐微間操桂楫雲生腋
欲采芙蓉露滿衣紫翠房深丹竈暖松杉秋靜鶴巢稀
明年去覓封君達應駕青牛說息機

過龍虎山

明甘瑾

素書一束展經綸
世業留侯異等倫
紫府羣仙天上籍
碧桃流水洞中春
吹簫羸女臺留鳳
送酒麻姑脯劈麟
看取步虛朝帝所
夜闌飛佩近星辰

贈鶴林周元初尊師

明孫蕡

物外逍遙月鼎翁
先生早歲得相從
榴皮畫壁成黃鶴
竹葉書符化綠龍
天女時聞蒼水佩
世人空拜藥珠峯
神遊倘遂煙霞約
便解朝衣問赤松

寄張心湛天師

明 王穉登

青鳥肯書久寂寥霓旌去入鳳城遙身披一品麟衣坐
手捧三公象簡朝長樂花深容曳履未央月出許吹簫
不須更上蓬萊頌清靜無為祝帝堯

七言排律

贈竺鍊師

元 宋无

姓疑乾竺古先生霞外幽棲近四明履斗星移冠劍影
步虛風引珮環聲藥宮夜喚青鸞降花洞朝騎白鹿行

長使芝童看藥竈為耽瓊液過蓬瀛鶴傳仙語歸華表
魚寄丹書上赤城怪石醉中拈筆畫險棊靜裏按圖爭
玉桃竊慣容留種瑤草尋多盡識名縮地日攜龍作杖
卧雲時約鳳吹笙海邊定與安期遇關上當逢尹喜迎
我本翠寒山道士相隨便欲採黃精

五言絕句

訪武陵道者不遇

唐薛瑩

花發鳥仍啼行行路欲迷二真無問處虛度武陵溪

贈道者

唐馬戴

深居白雲穴靜註赤松經往往龍潭上焚香禮斗星

題道士青山白雲圖

明張以寧

仙館白雲封青山第幾重道人時化鶴巢向最高松

其二

行到谿源盡青山無俗氣道人拈鐵笛吹起滿川雲

其三

只道谿源盡遙聞鐘磬音却尋流水去行盡白雲深

七言絕句

送司馬道士遊天台

唐宋之間

羽客笙歌此地違
離筵散處白雲飛
蓬萊闕下長相憶
桐柏山頭去不歸

河上歌

唐韓翃

河上老人坐古槎
含丹只用青蓮花
至今八十如四十
口道滄溟是我家

寄許鍊師

唐戎昱

掃石焚香禮碧空
露華偏濕禁珠宮
如何說得天壇上
萬里無雲月正中

贈成鍊師

唐劉言史

花冠纍帔色嬋娟
一曲清簫凌紫煙
不知今日重來意
更住人間幾百年

尋徐道士

唐張籍

尋師遠到暉天觀
竹院森森閉藥房
聞入靜來經七日
仙童簷下獨焚香

贈道士

張籍

茅山近別剗谿逢玉節青旄十二重自說年年上天去
羅浮最近海邊峯

同張鍊師谿行

唐施肩吾

青谿道士紫霞巾洞裏仙家舊是鄰每見桃花逐流水
無回不憶武陵人

員嶠先生

唐徐凝

員嶠先生無白髮海煙深處採青芝逢人借問陶唐主

欲進冰蠶五色絲

寄茅山孫鍊師

唐李德裕

獨尋蘭渚覩遲暉閒倚松窗望翠微遙想春山明月曉

玉壇清磬步虛歸

送張道者

唐賈島

新歲抱琴何處去洛陽三十六峯西生來未識山人面
不得一聽鳥夜啼

贈朱道靈

唐杜牧

劉根丹篆三千字郭璞青囊兩卷書牛渚磯南謝山北
白雲深處有巖居

訪劉君

唐裴夷直

擾擾馳蹄又走輪五更飛盡九衢塵靈芝老觀深松院
還有齋時未起人

贈張鍊師

唐溫庭筠

丹谿藥盡變金骨清洛月寒吹玉笙他日隱居無訪處
碧桃花發水縱橫

高道士

唐陸龜蒙

峩峨道士風骨峻手把玉皇書一通東遊借得琴高鯉
騎入蓬萊清淺中

送道者

唐司空圖

洞天真侶昔曾逢西岳今居第幾峯峯頂他時教我認
相招須把碧芙蓉

其二

殷勤不為學燒金道侶惟應識此心雪裏千山訪君易

微微鹿跡入深林

贈孫仁本尊師

唐韓偓

齒如冰雪髮如鬟幾百年來醉似泥不共世人爭得失
卧牀前有上天梯

送虞道士

唐李中

煙霞聚散通三島星斗分明在一壺笑說餘杭沽酒去
蔡家重要會麻姑

訪洞神宮邵道者不遇

李中

閒來仙觀問希夷雲滿星壇水滿池羽客不知何處去

洞前花落立多時

招西洞道者

唐李昭象

危峯抹黛夾晴川樹簇紅英草碧煙樵客雲僧兩無事
此中堪去覓靈仙

尋易尊師不遇

唐陳嶃

爛熳紅霞光照衣苔封白石路微微華陽洞裏人何在
落盡松花不見歸

寄清谿道者

唐僧齊已

萬重千疊紅霞嶂夜燭朝香白石龕常寄谿窗凭危檻
看經影落古龍潭

送魏道士

宋張詠

江上蕭蕭木葉飛天台狂客杖藜歸莫嫌俗吏勤相顧
曾是嵩陽舊掩扉

山中道士

宋謝翹

山中道士服朝霞二十修行別故家留客一杯清苦竈

蜂房知是近梅花

留贈丹陽王鍊師

金元好問

敝盡貂裘白髮新京華旅食記前身仙翁相見休相笑

同是邯鄲枕上人

訪劉道士

元朱德潤

雲林深處翠微多石室春深長薜蘿當代衣冠正高貴
不須閒誦采薇歌

訪道士

明廖孔說

露草煙林斷客行竹扉晝掩對高城道人不愛人天供
消受秋空鶴一聲



御定佩文齋詠物詩選卷二百三十九

欽定四庫全書

集部

御定佩文齋詠物詩選卷二百四十三

詳校官侍郎臣李封

主事銜臣徐以坤覆勘

總校官檢討臣何思鈞

校對官典簿臣郭祚熾

謄錄監生臣陳際龍

欽定四庫全書

御定佩文齋詠物詩選卷二百四十

步虛詞類

五言古

道士步虛詞

北周庾信

凝真天地表絕想寂寥前有象猶虛豁忘形本自然開
經壬子歲值道甲申年迴雲隨舞曲流水逐歌絃石髓
杳如飯芝房脆似蓮停鸞謫瑤水歸路上鴻天

其二

東明九芝蓋北燭五雲車飄颻入倒景出沒上煙霞春
泉下玉雷青鳥向金華漢帝看桃核齊侯問棗花上元
應送酒來向蔡經家

其三

歸心遊太極廻向入無名五香芬紫府千燈照赤城鳳
林採珠實龍山種玉榮夏簧三舌響春鐘九乳鳴絳河
應遠別黃鸝來相迎

五言律

步虛詞

唐顧況

廻步遊三洞清心禮七真飛符超羽翼焚火醮星辰殘
藥沾雞犬靈香出鳳麟壺中無窄處願得一容身

步虛詞

唐吳筠

紫府與玄洲誰來物外遊無煩騎白鹿不用駕青牛金
化顏應駐雲飛鬢不秋仍聞碧海上更用玉為樓

其二

玉樹雜金花天河織女家月邀丹鳳鳥風送紫鸞車霧
縠籠綃帶雲屏列錦霞瑤臺千萬里不覺往來賒

步虛詞

唐韋渠年

鸞鶴共徘徊仙官使者催香花三洞啟風雨百神來鳳
篆文初定龍泥印已開何須生羽翼始得上瑤臺

其二

上帝求仙使真符取玉郎三才間布象二景鬱生光騎
吏排龍虎笙歌奏鳳凰天高人不見暗入白雲鄉

步虛詞

宋徐鉉

氣為還元正心由抱一靈凝神歸罔象飛步入青冥整
服乘三素旋綱躡九星瓊章開後學稽首奉真經

五言排律

上元日聽太清宮步虛

唐張仲素

仙客開金籙元辰會玉京靈歌賓紫府雅韻出層城聲
雜音徐徹風飄響更清紆餘空外盡斷續聽中生舞鶴
紛將集流雲駐未行誰知陌上塵俗仰遺聲

七言律

步虛詞

明 朱真淤

瑤壇深處磬聲微 羽客朝元午夜歸
杳杳三山青鳥過 翩翩雙鳥彩鳬飛
島間月色明珠樹 洞裏丹光透玉扉
劍佩幾回翔碧落 天風吹冷六銖衣

其二

彩霞琪樹共氤氳 七色斑虬駕鶴羣
玉佩冷搖滄海月 寬裳晴帶絳霄雲
碧桃花綻春方永 金鼎丹成火自焚

午夜朝元向天闕空歌聲在始清聞

七言絕句

步虛詞

唐劉禹錫

阿母種桃雲海際花落子成二千歲滄海吹折最繁枝
跪捧金盤獻天帝

蕭鍊師步虛詞十首卷後以二絕繼之

唐白居易

欲上瀛洲臨別時贈君十首步虛詞天仙若愛應相問

向道江州司馬詩

其二

花紙瑤緘松墨字
把將天上共誰開
試呈王母如堪唱
發遣雙成更取來

步虛詞

唐司空圖

阿母親教學步虛三元長
遣下蓬壺雲韶韻俗停瑤瑟
鸞鶴飛低拂寶爐

步虛詞

唐高駢

清谿道士人不識上天下天鶴一隻洞門深鎖碧窗寒
滴露研朱點周易

御定佩文齋詠物詩選卷二百四十

欽定四庫全書

御定佩文齋詠物詩選卷二百四十一

道家雜類

四言古

洗藥池

晉葛洪

洞陰泠泠風珮清清仙居永劫花木長榮

五言古

讀道書作

宋朱子

巖居秉貞操所慕在元虛清夜眠齋宇終朝觀道書形忘氣自冲性達理不餘於道雖未庶已超名迹拘至樂在襟懷山水非所娛寄語狂馳子營營竟焉如

其二

白露墜秋節碧陰生夕涼起步廣庭內仰見天蒼蒼東華綠髮翁授我不老方願言勤修學接景三元鄉

閔真誥

明 張 簡

長史昔好道鍊真三秀峯夜感紫微仙降集華房中鸞

鳥鳴素月翠於颶
琅風搞詞託諷諭
贊揚皆真宗中有
餐霞人可以回嬰童
刻之白玉檢藏之華陽宮
真人有仙氣乃得探其蹤
我生慕元素無由啟愚蒙嘯詠金玉
章靈音朗九空懷仙起冥想飈然精靈通
焉能出囂淳歛忽驂雲龍

五言律

道家三首奉敕撰

唐張說

金壇啟曙闔真氣肅微微落月銜仙竇初霞拂羽衣香

隨龍節下雲逐鳳簫飛暫往蓬萊戲十年始一歸

其二

窈窕流精觀深沈紫翠庭金蓮調上藥寶案讀仙經作賦看神雨乘槎辨客星祗應謝人俗輕舉託雲輶

其三

道記開中籙真官表上清焚香三鳥至煉藥九仙成天上靈書下空中妙伎迎迎來出煙霧渺渺戲蓬瀛

贈辟穀者

唐張籍

學得餐霞法，逢人贈小還。
身輕會試鶴，力弱未離山。
無食犬猶在，不耕牛自閒。
朝朝空漱水，叩齒草堂間。

元日女道士受籙

唐賈島

元日更新夜，齋身稱淨衣。
數星連斗出，萬里斷雲飛。
霜下磬聲在，月高壇影微。
立聽師語了，左肘繫符歸。

月下留丹竈

唐司空圖

月下留丹竈，壇邊樹羽衣。
異香人不覺，殘夜鶴分飛。
朝會初元盛，蓬瀛舊侶稀。
瑤函真跡在，妖魅敢揚威。

七言律

題雍丘崔明府丹竈

唐李白

美人為政本忘機服藥求仙事不違葉縣已泥丹竈畢瀛洲當伴赤松歸先師有訣神將助大聖無心火自飛九轉但能生羽翼雙鳬忽去定何依

道服

宋王禹僫

楮符布褐皂紗巾曾奉西垣寓直人此際暫披因假日如今長著見閒身濯纓未識三湘水漉酒空經六里春

不為行香著朝服二車誰信舊詞臣

井西丹房

元張憲

葛井西頭更向西丹房高與白雲齊鉛田虎下飛紅電
汞海龍沈結紫泥山鬼俯欄窺火候爐神伏地馬刀生
飲餘一醶中黃酒坐聽鶗聲松上啼

七言絕句

武陵龍興觀黃道士房問易因題

唐王昌齡

齋心問易太陽宮八卦真形一氣中仙老言余鶴飛去
玉清壇上雨濛濛

聞陳山人定命丹成試以詩乞

宋文同

水火相交養大還已聞神汞滿爐乾瓶肪穀漆尋常得
教服靈丹二萬丸

煉丹井

元吳景奎

丹成遺井在層巔金碧靈光夜燭天抱甕道人間不得

白雲深處灌芝田

欽定四庫全書

卷二百四十一

御定佩文齋詠物詩選卷一百四十一

欽定四庫全書

御定佩文齋詠物詩選卷二百四十二

食物總類

五言古

會食

宋孔平仲

學宮不置酒相聚惟一飯公家事何多客至日已晚乘
饑騁大嚼美惡寧復揀僕夫無所餘顧我色不滿澄茶
旋煎湯就火自烘盞從容共談謔熟視笑而莞昌齡豈

其慍策馬獨先返

冬日放言

宋張耒

寒羊肉如膏江魚如切玉肥兔與奔鶴日夕懸庖屋嬉
嬉顧妻孥滋味喉可欲謫官但强名比者何不足

園居荒蕪春至草生日尋野蔬以供七筋今日

枯枿間得蒸菌四五亦取食之自笑窮甚戲

作此詩

宋程俱

平生囁嚅口出語無媚悅定非肉食姿賦分在藜蕨僑

居得空園窮陋亦清絕分陰豈不惜飽睡送日月蕪菁
不須種衆草今已茁朝來一雨過青細皆可掇東籬有
更生杞拘僅堪培乃知天隨生豈羨五鼎列堂萱不吾
負芽甲破春雪糜身薦瓢簞解我憂思結齊花雖未繁
著地爛於纈驚雷發蒸菌自可當夏鼈馬蘭亦芳脆人
覓固凡劣晴朝當炙背俯僂事挑抉家人各盈襜汲井
手自挈滿炊太倉陳侑以冬菹冽盤中長閼干置饋每
虛撤恨無籜龍苞此味那得闢長謠青青槐饑液想庭

樾妻孥復相誚
男子志勲烈君非老浮圖
菜本可長嗜
况滋閒草木豈為刀匕
設乃翁笑摩腹萬事付一吹
此中有真趣勿為兒輩說

郊舍雜書

宋 陸 游

折蓮釀作醯采豆治作醬
開歷揆日時汲井滌瓮盎上
奉時祭須下給春耕餉咨爾後之人
歲事不可曠

七言古

附長短句

北客置酒

宋 王安石

紫衣操鼎置客前巾韁稻飯隨梁饋引刀取肉割啖客
銀盤擘膾斂與鮮殷勤勸侑邀一飽卷牲歸館觴更傳
山蔬野果雜飴蜜獾脯豕腊加魚煎酒酣衆史稍欲起
小兒猝耳爭畱連為渠止飲且少安一杯相屬非偶然

汎舟城南會者五人分韻賦詩

宋蘇軾

紫鱠鱸魚賤如土得錢相付何足數碧筍時作象鼻彎
白酒微帶荷心苦運肘風生看斫鱠隨刀雪落驚飛縷

不將醉語作新詩飽食應慚腹如鼓

謝景叔惠冬筍雍酥水梨三物

宋黃庭堅

玉人憐我長蔬食走送廚珍不自嘗秦牛肥膩酥勝雪
漢苑甘寒梨得霜冰底斲春生筍束豹文解籜饌寒玉
見他桃李憶故園饑獠應殘遼窗竹

以尊薑法魚糟蟹寄子瞻

宋秦觀

鮮鯽經年清醞醕團臍紫蟹脂填腹後春尊茲滑於酥

先社薑芽肥勝肉鳬卵纍纍何足道飣餃盤餐亦時欲
淮南風俗事瓶罌方法相傳為旨蓄魚鱠蜃醢薦邉豆

山菽谿毛例蒙錄輒送行庖當擊鮮澤居備禮無麋鹿

冬夜與溥菴主說川食戲作 宋陸游

唐安薏米白如玉漢嘉粗脯美勝肉大巢初生蠶正浴
小巢漸老麥米熟龍鶴作羹香出釜木魚淪菹子盈腹
未論索麯興饋飯最愛紅糟並羹粥東來坐閱七寒暑
未嘗舉箸忘吾蜀何時一飽與子同更剪土茗浮甘菊

船中蔬飯

宋楊萬里

食蕨食臂莫食拳食筍食梢莫食根何曾萬錢方下箸
先生把菜亦飽去嶺南風物似江南筍如束新蕨作籃
先生食籍幾萬卷千巖萬壑皆厨傳

春盤

宋方岳

菜菔根鬆綾冰玉萎蒿苗肥點寒綠霜鞭行茁軟於酥
雪樹生釤肥勝肉與我同味蔊絲辣知我長貧韭薤熟
更蒸肫壓花層層畧粵鳬成金粟粟青紅餽釤間梅柳

翠紫招邀醉松竹擎將碧脆卷月明嚼出宮商帶詩馥
賜幡羞上老人頭家園不負將軍腹人生行樂未渠央
物意趨新自相續不妨細雨看梅花且喜春風到茅屋

林公勵志薰修七日不食走筆問之

明 王世貞

東林公東林公禪房寂寂蒼苔空七日不受人天供出
門雙頰桃花紅我不願白牛乳廻汝黃金色亦不願一
麻復一米令汝肌膚削如腊藜羹豆飯香且圓樹影忽

過牆西偏即呼雜食吾亦可飽啜松風任意眠

五言律

孟倉曹步趾領新酒醬二物滿器見遺老夫

唐杜甫

楚岸通秋屐胡牀面夕畦藉糟分汁滓甕醬落提攜飯
糲添香味朋來有醉泥理生那免俗方法報山妻

題李工墓壁

唐
李商隱

舊著思玄賦新編雜擬詩江庭猶近別山舍得幽期嫩

割周顥韭肥烹鮑照葵飽聞南燭酒仍及潑醅時

雜興

宋唐庚

夜語不覺久晨興良獨難加之得卯酒晚矣恰朝餐
蕨春生箸魚蝦海入盤南方禁太飽茗椀直須寬

初夏齋中雜題

元柳貫

壞隔谿流斷門依野次成初非慵應接自是寡將迎
蕨搜山得鹽醯入市營貲居薄滋味盤膾敢求精

谿蕨雜詠

元僧清珙

山廚修午供泉白似銀漿羹熟筍鞭爛飯炊粳米香油
煎青頂蕈醋煮紫芽薑百味皆難及何須說上方

其二

結草便為菴年年用覆苔紙窗松葉暗竹屋蘚花粘麥
飯惟饒火藜羹不點鹽生涯隨分過誰管世人嫌

句曲秋日郊居雜興

明 楊 基

編竹補疎籬生芻束酒旗雞豚田祖廟鷹犬獵神祠玉
糴菰為粉璣酥豆作糜兒童採蘆葉爭學短簫吹

五言排律

食後

唐王績

田家無所有晚食遂為常菜剪三秋綠殼炊百日黃胡
麻山麩樣楚豆野糜方始曝松皮脯新添杜若漿葛花
消酒毒萸蔞發羹香鼓腹聊乘興寧知逢世昌

七言律

謝主人惠綠酒白魚

唐徐夤

早起鶲聲頻送喜白魚芳酒寄來珍馨香乍揭春風甕

撥刺初辭夜雨津樽闊最宜澄桂酒網疎殊未損霜鱗
不曾垂釣兼親醞堪媿金臺醉飽身

泗州除夜雪中黃實送酥酒

宋蘇軾

關右土酥黃似酒揚州雲液郤如酥欲從元放覓拄杖
忽有麴生來坐隅對雪不堪令飽煖隔船應已厭歌呼
明朝積玉深三尺高枕牀頭尚一壺

二月十九日攜白酒鱸魚過詹使君食槐葉冷

淘

蘇軾

枇杷已熟爍金珠桑落初嘗濫玉俎暫借垂蓮十分盞
一澆空腹五車書青浮卵椀槐芽餅紅點冰盤藿葉魚
醉飽高眠真事業此生有味在三餘

對客再次韻

宋陳造

客來一笑同鄉味便粉秋菰刷藕泥糟泥子薑仍舊法
籠緘乾筭儼新題白魚紫鱠空濡沫窘兔驚麋想碭迷
自揣臚儒合蔬羈放麌終恐媿巴西

閒居

宋唐庚

細細敲門細細應老翁方曲畫眠肱魚陂舊種千頭鱠
桑徑新窠十畝繒菜足尚堪分地主米餘翻欲供鄰僧
平生雅有乘桴興咫尺滄溟去未能

對食戲詠

宋陸游

一飽欣逢歲小穰時憑野餉誑枯腸橙黃出白金釐美
荔脆供盤玉片香客送輪茵霜後蟹僧分磊落社前薑
秋來幸是身強健聊為佳時舉一觴

謝余處恭送七夕酒果蜜食化生兒

宋楊萬里

跟蹤兒孫忽滿庭折荷騎竹臂春驚巧樓後夜迎牛女
畱鑰今朝送化生節物催人教老去壺觴拜賜喜先傾
醉眠管得銀河鶴天上歸來打六更予庚戌考試殿廬
夜漏終五更之後

復打一更問之雞
人云宮漏有六更

以糟蟹洞庭甘送丁端叔端叔有詩因和其韻

楊萬里

斗州只解寄鷺毛鴨肉何曾饋百牢驅使木奴供露顆

催科郭索獻霜螯鄉封萬戶只名醉天作一丘都是糟
却被新詩太清絕喚將雪虐更風饕

謝史石窗送酒並茶

宋戴復古

遣來二物應時須客子行廚用有餘午困正憑茶料理
春愁全仗酒消除不勝歡喜拜嘉惠無限慇懃作謝書
君既有來何以報一牀蘄簟兩淮魚

十七日驛中作春盤

是日早行始憶昨日立春

元耶律楚材

昨朝春日偶然忘試作春盤我一嘗木案初開銀線亂
砂瓶煮熟藕絲長勻和豌豆操葱白細剪薑蒿點韭黃
也與何曾同是飽區區何必待膏梁

贈富察元帥

耶律楚材

使君排飯宴南谿不枉從君鳥鼠西春薤旋澆濃鹿尾
臘糟微浸軟駝蹄絲絲魚膾明如玉屑屑雞生爛似泥
白面書生知此味從今更不嗜黃虀

其二

主人開宴醉華胥一派絲篁沸九衢
點紫蒲萄垂馬乳輕黃色欖燉牛酥
金波汎蟻斟歡伯雪浪浮花點酪奴
忙裏偷閒誰若此西行萬里亦良圖

謝飛卿飯再用韻紀西遊事

耶律楚材

河中花木蔽春山爛賞東風縱寶鞍畱得晚瓜過臘半
藏來秋果到春殘親嘗芭欖寧論價自釀蒲萄不納官
常歎不才還有幸滯畱遐域得佳餐

四月二十八日起屢賜鮮筍青梅鮆魚枇杷楊

梅雪梨鮮藕

明 程敏政

都城三伏暑方炎天上分鮮我亦霑纖發紫泥畱榼筭
香生青箬帶冰鹽南州遠貢來何數北客初嘗味更添
為感歲時繙賜帖不知殘日下疎簾

丙戌冬至南郊扈駕聖母軫念天寒特賜薑蘇

杏仁一盒

明 于慎行

黃門飛輶到天壇傳道東朝賜講官祇為甘泉勞扈從
特從溫室下盤餐調蘭欲動先春色斲桂渾消午夜寒

慈念殷勤知有望慚無一字罄衷丹

五言絕句

和晏相公湖上

宋韓維

穫水登紅稻
稻舟割紫菱
杯盤見秋物
江海思飛騰

遣懷絕句

明顧璘

野鮮蒼兕美山鮆
鷓鴣香市筍
擣苞出倉禾
帶把藏

七言絕句

蔬食

唐陸龜蒙

孔融不要畱殘膾庾悅無端吝子鴛香稻熟來秋菜嫩
伴僧餐了聽云何

和龐公謝子魚荔枝

宋蔡襄

霜鱗分不登枯肆丹實全應勝木奴欲効野芹羞獻去
敢期佳什墜驪珠

六月二十七日望湖樓醉書

宋蘇軾

烏菱白芡不論錢亂繫青菰裹綠盤忽憶嘗新會靈觀
滯畱江海得加餐

次韻錢穆父馬上寄蔣穎叔。蘇軾

玉闌不用一丸泥自有長城鳥鼠西剝與故人尋土物

臘糟紅麯寄駝蹄

秋日郊居

宋陸游

秋日畱連野老家朱槃鮓鱠粲如花已炊藟散真珠米
更點丁坑白雪茶

小飲俎豆頗備江西淮浙之品戲題

宋楊萬里

滿盤山海眩芳珍未借前籌已嚥津蠶醬子魚總佳客

玉裡黃雀是鄉人

明仁殿進講

元貢師泰

殿前冠佩儼成行玉椀金瓶進早湯自愧平生飯藜藿

朝來得食大官羊

瀛京雜詠

元楊允孚

嘉魚貢自黑龍江西域蒲萄酒更良南土至奇誇鳳髓

北陲異品是黃羊

其二

內人調膳侍君王玉仗平明出建章
宰輔乍臨闈閣表小臣傳旨賜湯羊

其三

湯羊內膳日差排紅帖呼名到玉階
底事金吾呵不住腰間懸得象牙牌

其四

海紅不似花紅好杏子何如芭攬良更說高麗生菜美

總輸山後蕨菰香

輦下曲

元 張 显

儒臣奉詔修三史丞相銜兼領總裁卒士院官傳賜宴
黃羊桐酒滿車來

糟豚蹄東陽酒送理之

元 薛 漢

彭生失足落糟丘醉入肌膚味更優亦有麴生差可意
伴君倚檻看春流

次韻答石室元晦

元 僧大訴

不識往來相熟未青衣迎棹慣看人糗餐分餉家家似
薯蕷炊香頓頓新

鄰農以麥飯菜羹見餉

明居節

來年作飯菜為羹慚愧山農餉我情一飽年來非易得
五湖無地可躬耕